

La Quotidiana 18-10-2016, p. 2

Revisiun da la lescha da chatscha contestada

■ (anr/fa) **Causa l'incumbensa Kasper per dis da chatscha er durant il mais october ha la regenza revedì la lescha da chatscha parzialmain. Il cussegl grond nun era d'accord davart tractar questa revisiun u betg.** A chaschun da la sessiun da favrer 2015 avevan inoltrà deputà *Christian Kasper* (pld, Luzein) ed auters ina incumbensa. Quella aveva la finamira d'avrir la chatscha sin il tshiervi cotschen durant il mais october per maximalmain quatter dis. Uschia na vegniva messa explicitamain en dumonda la chatscha speziala. La regenza aveva rendì attent ch'i saja l'emprim da spetgar la decisiun en la dispita giuridica tar l'iniziativa «Per ina chatscha cumpatibla cun la natira ed etica». Durant la sessiun da zercladur ha il parlament però inoltrà l'incumbensa Kasper e surdà a la regenza il pensum da reveder parzialmain la lescha da chatscha e preschentar la missiva correspondententa al cussegl grond. Quai è stà il cas glindesdi suentermezdi, l'emprim di da la sessiun d'october.

Spetgar las decisiuns davart las iniciativas

Gia al cumenzament d'october era vegnì declerà da pliras varts, sco p. ex. da la fracziun dals chatschaders en il parlament e da la pld, da refusar d'entrar en la debatta detagliada da la lescha revedìda. Era la cumissiun predeliberanta presidiada da *Walter Grass* (pbd, Tusaun) era da different avis. La maioritad (set vuschs) e la regenza han cusseglià da tractar la lescha revedìda. La minoritad (quatter vuschs), cun il pledader *Andreas Felix* (pld, Tschintg Vitgs), ha argumentà che la chatscha grischuna saja reglada sufficientamain per garantir ina chatscha cumpatibla a la natira. Ultra da quai saja da spetgar l'emprim la decisiun dal pievel davart l'iniziativa per ina chatscha etica e la decisiun dal tribunal federal davart l'iniziativa cunter la chatscha speziala sco era legislaziun federala davart la chatscha.